

.....aren ...(e)ko/2008 FORU DEKRETUA, interes orokorreko xedeen esparruan lehentasunezko mezenasgo jarduerak 2008. urterako ezartzen dituen.

Apirilaren 7ko 3/2004 FORU ARAUAK, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, mezenasgoari aplikagarri zaizkion zerga pizgarriak arautzen ditu III. tituluak.

Zehazki esanda, titulu horretako IV. kapituluak jasotzen du zein zerga onura aplikatzen zaizkien lehentasuna aitortua duten jardueri eta aparteko interes publikoa duten gertakarietan laguntzeko programei.

Lehentasunezko mezenasgo jardueri dagokienez, aipatutako foru arauaren 29. artikulua dio Gipuzkoako Foru Aldundiak lehentasunezko mezenasgo jardueren zerrenda bat egin ahal izango duela, ekitaldi bakoitzerako, interes orokorreko xedeen esparruan, bai eta entitate onuradunak zeintzuk diren zehaztu eta aipatutako artikuluan aurreikusitako zerga onurak aplikatzeko jarduera horiek bete beharreko baldintzak eta beharkizunak finkatu.

Bada, foru dekretu honek ez du beste helbururik ez bada zerrendatzea zein jarduera jotzen diren lehentasunezko zat 2008. urterako, eta, halaber, adieraztea zein entitate onuradunek jaso behar dituzten ekarpenak, halakorik bada, eta nolako baldintza eta beharkizunak bete behar diren jarduera horien garapenean.

Horiek horrela, Ogasuneko eta Finantzetako foru diputatuak proposaturik, Lege Aholkularitzako Batzordeari entzun ondoren, eta Diputatuen Kontseiluak gaurko bileran eztabaidatu eta gero, honako hau

XEDATU DUT

1. artikulua. Xedea.

Foru dekretu honen helburua da interes orokorreko xedeen esparruan lehentasunezko zat jotzen diren mezenasgo jarduerak 2008. urterako ezartzea, eta, orobat, adieraztea zein entitate izango diren onuradunak eta zein baldintza eta beharkizun bete behar dituzten jarduera horiek apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, 29. artikuluan xedatutakoaren ondorioetarako.

2. artikulua. Lehentasunezko jarduerak.

Bat. 2008. urterako, honako jarduerak izango dira lehentasunezkoak:

1. Gizarte politiken esparruan:

- a) Adineko pertsonentzat eta pertsona ezgaituentzat egoitza eta eguneko zentro berriak sortzea.
- b) Adinekoentzako egoitzetan unitate psikogeriatrikoak sortzea.
- c) Landa eremuko udalerrietan zentro balioanizdunak sortzea.
- d) Zentro berriak eraikitzea edo orain daudenetan plaza gehiago sortzea gizartean baztertuta geratzeko arriskuan dauden pertsonen laguntzeko.
- e) Zentroak osasun eta segurtasun gaietan indarrean dauden arauetara egokitzeko lanak, horiek indarrean dagoen araudira egokitzeko prozesu orokorraren barruan.
- f) Gizarte bazterketa jasaten duten pertsonak gizarteratzea helburu duten programak eta jarduerak.
- g) Gizartean baztertuta geratzeko arriskuan dauden pertsonen laguntzeko ematen diren diruzko zein gauzazko dohaintzak.

2. Kirolaren esparruan:

- a) Gipuzkoako Foru Aldundiak 2007/2008 eta 2008/2009 ikasturteetarako onartzen dituen eskola kiroleko jardura programetan ezarritako baldintzak eta beharkizunak betetzen dituzten kirol jarduerak.
- b) Gipuzkoako kirol elkarte, selekzio eta kirolariek kirol txapelketa ofizialetan parte hartzea, betiere foru dekretu honen 4.4.A) artikuluan ezarritako baldintzak betetzen badira.
- c) Foru dekretu honen 4.4.B) artikuluan ezarritako baldintzak betetzen dituzten kirol ekitaldiak.
- d) Kirolgi Fundazioak Gipuzkoako errendimenduzko kirola mantendu, sustatu eta antolatzeko egiten dituen programa eta jarduerak.
- e) Gipuzkoako Kirol Federazioen Elkarteko jarduerak, baldin eta beraren plan estrategikoan sartuta badaude, Gipuzkoako federazio sistema osoari onura badakarkiate, eta Kirol Zuzendaritza Nagusiaren adostasuna badute.
- f) Gipuzkoako Kirol Egokituaren Federazioak antolatzen dituen jarduerak, pertsona ezgaituek kirola egitea bultzatzen dutenean.
- g) Emakumeak kirolean parte hartzea bultzatzen duten jarduerak.
- h) Kirolean joko garbia eta dopaketaren aurkako borroka bultzatzen dituzten jarduerak.

i) Kirol gaiekin lotuta mugaz gaindiko lankidetzaren esparruan Kirolaren Eurosareak sustatzen dituen jarduerak.

3. Kanpoko ekintzen esparruan, mugaz gaindiko lankidetzaren arloan mugaren bi aldeetako entitate publiko zein pribatuek antolatutako jarduerak, Baiona-Donostia Euskal Eurohiriaren Mugaz Gaindiko Agentziaren estatutuek 2. artikuluan definitutako helburu soziala osatzen duten ekintzen barruan sartuta badaude.

4. Euskararen esparruan:

a) Euskarazko aldizkako argitalpenak.

b) Euskara sustatzeko proiektu eta jarduerak.

c) Euskarazko ikus-entzunezko proiektuak.

d) Euskaraz garatutako haur eta gazteen aisialdirako produktuak ekoiztu eta zabaltzeko proiektuak.

e) Euskaraz emititzen duten herri eta eskualde mailako telebistak.

f) Gipuzkoa 2.0 programari atxikitako jarduerak.

g) Gipuzkoako Foru Aldundia partaide den entitateen edo harekin hitzarmena indarrean duten entitateen euskararekin lotutako programak egitea.

5. Kulturaren esparruan:

a) Euskal artista profesional garaikideen erakusketen arte galerietako produkzioak.

b) Kultur ondasun kalifikatuak eta inbentariatuak artatu edo balioztatzeko egiten diren jarduketak.

c) Nazioarte mailako kultur programak egitea.

d) Gipuzkoako Foru Aldundia partaide den entitateen edo harekin hitzarmena indarrean duten entitateen kultur programak egitea.

e) Argitalpenen industriadako nahiz industria fonografiko, ikus-entzunezko, multimedia eta eszenikoetarako (antzerki, dantza, musika) Gipuzkoako Lurralde Historikoan egiten diren ekoizpenak.

f) Gipuzkoako museo eta artxiboetan inbertitzea edo jarduketak egitea, horietan bilduma propioa dagoenean eta beren kudeaketarako instalazio eta langile egokiak eta kualifikatuak dituztenean.

g) Gipuzkoako kultur ekipamenduetan inbertitzea eta euskal kultura tradizionalarekin lotutako jarduerak burutzeko ekarpenak egitea.

6. Berrikuntzarako eta jakintzaren gizarterako politiken esparruan, lehentasunezko mezenasgo jarduerak izango dira nanozientzia, nanoteknologia, mikroteknologia, genomika eta proteomika, eta bioteknologia alorrean egiten diren ikerketa jarduerak nahiz biomasaren, bio-erregaien eta erregaizko pilen energia berriztagarrietan egiten direnak.

Bi. Apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, 29. artikuluan ezartzen dituen zerga onurak ez dira aplikagarriak izango Pertsona Fisikoen Errentaren gaineko Zergaren zergadunek, Sozietateen gaineko Zergaren subjektu pasiboek edo Ez-egoiliarren Errentaren gaineko Zergaren zergadunek aurreko bat apartatuan adierazitako esparruetako edozeinetan doan egindako zerbitzu prestazioetan.

3. artikulua. Entitate onuradunak.

Bat. Aurreko artikuluan aipatutako jardueretako bat edo batzuk, irabazi asmorik gabekoak, finantzazio propioa erabiliz nahiz hirugarrenek egindako ekarpenen bidez egiten edo garatzen dituzten guztiak izaten ahalko dira, oro har, entitate onuradunak.

Bi. Jarraian adierazten diren jardueri dagokienez, honako hauek izango dira entitate onuradunak:

A) Aurreko 2.bat artikulua 1. apartatuko f) eta g) letretan jasotako jardueren kasuan, entitate onuradunak edo sustatzaileak honako hauek izango dira: beren jardueren artean helburu gisa apartatu horretan jasotakoak dituztenak, betiere Gizarte Politikako Departamentuarekin 2008rako lankidetzeta hitzarmena sinatu badute politika edo jarduera horien garapenean parte hartzeko.

B) Euskararen esparruko jardueri dagokienez –aurreko 2.bat artikulua 4. apartatuan aipatu dira horiek–, irabazi asmorik gabeko entitateek ezarrita dauden baldintzak eta beharkizunak bete beharko dituzte apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, II. tituluaren aurrekuste duen araubidera bildu ahal izateko.

C) Aurreko 2.bat artikulua 5. apartatuko e) letran aipatutako jardueren kasuan, entitate onuradunak edo sustatzaileak izango dira aipatutako kultur jardueretan azken hiru urteetan modu enpresarial eta jarraituan aritu direnak.

4. artikulua. Jarduerak bete beharreko beharkizun eta baldintzak.

1. Aurreko 2. artikuluan aipatutako jarduera bat edo batzuk egiten edo garatzen dituzten pertsona edo entitate guztiek idatziz eskatu beharko dute delako jarduera lehentasunezkoen barruan sartzeko, espresuki hala izenda dadin; jarduketa eremuaren arabera Gipuzkoako Foru Aldundian eskudun den Departamentuari aurkeztuko zaio eskaera hori.

2. Aurrekoa hala izanik ere, lehentasuna aitortua duten jarduerak, gainera, jarduketa esparru bakoitzerako jarraian ezartzen diren beharkizun eta baldintzak bete beharko dituzte:

3. Gizarte politiken esparruan:

A) Esku-hartze arkitektonikoaren proiektua, eta ekipamendua edo jarduera-programa hornitzeko proiektua, barruan sartuta inbertsio, gastu eta sarreren aurrekontua.

B) Gizarte Politikako Departamentuaren aldeko txostena eta, hala badagokio, haren baimena.

Aurreko bi letretan aipatu den dokumentazioa lehendik aurkeztu bazaio, beste arrazoi batzuegatik, Gizarte Politikako Departamentuari, ez da zertan aurkezturik izango.

4. Kirolaren esparruan:

A) 2.bat. artikulua 2. apartatuko b) letran aipatzen diren jardueren kasuan honako baldintzak bete beharko dira:

a) Errendimenduko kirol txapelketa ofiziala izatea eta izaera profesionalik ez edukitzea.

b) Parte hartzea estatuko bi maila gorenetako batean, Europako edo munduko txapelketa batean, edo nazioarteko kirol topaketetan. Taldekako zenbait kirol modalitateetan, hirugarren mailan aritzea aintzakotzat hartuko da txapelketetako lurralde esparrua Autonomia Erkidegoaz gaindikoa denean.

c) Dagoen parte hartzea Autonomia Erkidegoko edo estatuko hedabideetan agertzea.

d) Lehiaketak garrantzia izatea kirol edo gizarte mailan.

Mendiko kirol modalitatean, lehentasunezkoak izango dira zortzi mila metrotik gorako gailurrak igotzea eta goi mailako eskaladak egitea.

Bertako kirolak direnean –tosta finkoko arraunketa, pilota, boloak eta toka eta herri kirolak-, bakoitzaren ezaugarrien arabera erabakiko da lehiaketako lurralde eremua.

B) 2.bat artikulua 2. apartatuko c) letran aipatzen diren kirol ekitaldien kasuan, honako baldintzak bete beharko dira:

a) Nazioartean parte hartze esanguratsua izatea, bai kualitatiboki bai kuantitatiboki. Eskakizun hori ez da kontuan hartuko bertako kirol modalitateak direnean edo ekitaldien helburu nagusia kirol errekreazioa denean, baldin eta, azkeneko kasu horretan, mila kirolarik baino gehiagok parte hartzen badute.

b) Kirol jarduerak, zati batean behintzat, Gipuzkoan egitea.

c) Autonomia Erkidegoko edo Estatuko hedabideetan agertzea.

d) Kirol edo gizarte mailan behar adinako garrantzia izatea.

C) 2.bat artikulua 2. apartatuko f), g) eta h) letretan aipatzen diren jardueren kasuan, programa lehentasunezkoetat jotzeko eskaerarekin batera proiektua aurkeztuko da, bai eta inbertsio, gastu eta sarreren aurrekontua ere, eta Kirol Zuzendaritza Nagusiaren oniritzia beharko da beti.

5. 2.bat artikulua 4. apartatua aipatu diren jardueri dagokienez, euren aurrekontuak ezingo du gainditu hogeita mila euroko kopurua, eta ezinbestekoa izango da horiek egiten dituen entitatearen zatirik handiena bazkideen kuotekin ez finantzatzea.

6. Kulturaren esparruan:

A) Jarduerak kulturaren esparruan lehentasunezko zatitza jotzeko eskaerak 3 hilabeteko epean aurkeztuko dira, foru dekretu hau argitaratu ondorengo egunetik kontatzen hasita.

B) Aurreko 2.bat artikulua 5. apartatua b) letran aipatzen diren jardueren kasuan, ondasunak Eusko Jaurlaritzak babestuta egon behar du, dagokion dekretuaren bitartez, eta babes maila ondasun kalifikatu edo inbentariatuarena izan. Kasu horretan, egingo den jarduerak bat etorri behar du Eusko Jaurlaritzaren dekretuan ezartzen den babes erregimenarekin. Gainera, jarduketara proiektua eta inbertsio, gastu eta sarreraren aurrekontua aurkeztuko dira.

C) Aurreko 2.bat artikulua 5. apartatua c) letran aipatutako jardueri dagokienez, nazioarteko kultur proiektuak hartuko dira nazioarte mailan aitormena lortu duten sortzaile lokalen obrak ezagutaraztea helburu dutenak, espainiar estatutik kanpo jarduten duten kultur erakundeek egindakoak edo herrialde desberdinetako artistak partaide diren bestelakoak.

Programa lehentasunezko zatitza jotzeko eskaerarekin batera, jarduketara proiektua eta inbertsio, gastu eta sarreraren aurrekontua aurkeztuko dira.

D) 2.bat artikulua 5. apartatua d) letran adierazitako jardueri dagokienez, entitateak partizipatuak direla ulertzen da erabakiak hartzeko organoetan Gipuzkoako Foru Aldundiak ordezkari bat duenean.

Kasu horretan ere, eskaerarekin batera jarduketara proiektua eta inbertsio, gastu eta sarreraren aurrekontua aurkeztuko dira.

E) 2.bat artikulua 5. apartatua e) letran aipatzen diren jardueri dagokienez, argitalpenen industria izango da batik batik liburuak argitaratzeagatik fakturatzen duena. Industria fonografikoa batik batik diskoak kaleratzeagatik fakturatzen duena. Ikus-entzunezko industria telebista eta zinerako edukiak ekoizten dituenak. Multimedia industria testu, irudi eta soinua biltzen dituzten edukiak ekoizten dituenak. Eta antzerki enpresa testu dramatikoak ekoiztu eta antzeztu dituenak.

Jarduera lehentasunezko zatitza jotzeko eskaerarekin batera, proposatutako produkzioaren proiektu edo programa aurkeztuko da, inbertsio, gastu eta sarreraren aurrekontua erantsita.

F) 2.bat artikulua 5. apartatua f) eta g) letran aipatutako jardueri dagokienez, inbertsio proiektu bat edo jarduera programa bat aurkeztu beharko da, gastu eta sarreraren aurrekontua ere erantsita, eta Gipuzkoako Foru Aldundiko Kultura eta Euskara Departamentuaren aldeko txostena jaso beharko du.

5. artikulua. Elkarrekotasuna jarduerak izendatzean.

Apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, 31. artikuluan xedatzen duenez, foru arau horren 29. artikuluan aurreikusi diren zerga onurak Estatuko eta beste foru lurraldeetako organo eskudunek lehentasunezkoztat jotzen dituzten jardueri eta programei ere aplikatuko zaizkie, baldin eta, haiek onartua duten araudian beste hainbeste egiten bada Gipuzkoako Foru Aldundian onartutako jarduera eta programekin.

XEDAPEN GEHIGARRIA.

Apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, eta, orobat, azaroaren 2ko 87/2004 Foru Dekretuak, irabazi asmorik gabeko entitateen zerga erregimena eta mezenasgoaren aldeko zerga pizgarriak aplikatzeko Erregelamendua onartzen duenak, hurrenez hurren 29.4 eta 8. artikuluan aipatzen duten agiriak onura fiskala aplikatua duen zergaren aitorpena Ogasun eta Finantza Departamentuan hartu duen kudeaketa organoaren oniritzia jaso beharko du.

AMAIERAKO XEDAPENA.

Foru dekretu hau Gipuzkoako Aldizkari Ofizialean argitaratu ondorengo egunean jarriko da indarrean, eta 2008ko urtarrilaren 1etik aurrera sortuko ditu ondorioak.